

## 破窯賦（宿命論）

宋宰相 呂蒙正

天有不測風雲，人有旦夕禍福。蓋聞蜈蚣百足，行不及蛇；雉雞兩翼，飛不及鳥；馬有追風之雄，無人不能自往；人有沖天之志，非運不能自通。貧賤不能移，富貴不能屈；文章蓋世，孔子厄於陳邦；武略超群，太公釣於渭水。顏回短命，原非凶惡之徒！盜跖長年，豈是善良之輩？堯帝稱聖，卻生不肖之兒；瞽瞍雖頑，反生大孝之子。張良原是布衣，蕭何曾為筆史；晏子身形短劣，封為齊國賢臣；孔明臥居草廬，能做蜀漢軍師；李廣才誇射虎，到老無封；馮唐胸有安邦之志，一生不遇。漢王柔弱，有萬里之山河；楚霸英雄，難免烏江自刎。伍員乞食於吳市，韓信受辱於胯下，及至運到，腰懸王印，一旦時衰，傷於陰人之手。王翦收趙，統百萬之雄兵，主上猜疑，卒至身首兩分。

人生在世，有先貧而後富，有先富而後貧，有少壯而老衰，青年美婦卻配愚蠢之夫，俊俏才郎卻配粗醜之婦；才疏學淺，少年及第登科；滿腹文章，皓首仍在深山。青樓妓女時來配作夫人，閨閣嬌娥運舛反為娼妓。蛟龍未遇，潛身於魚蝦之中；君子失時，拱手於小人之下。

初貧君子常存禮義之容，乍富小人不脫賤寒之體，時雖不足，只宜守分安心，心存不欺，必有榮華之日。天不得時，三光失曜；地不得時，草木不生；人不得時，運道不通。人若不依根基，誰不欲富貴也；吾昔日被困破窯，日則求於僧膳，夜則宿於破窯，思衣不能遮其體，思食不能充其飢，上人憎，下人壓，人道吾賤非賤也，此乃時也、命也、運也。

今日官居極品，位列三台，屈膝於一人之下，立身於萬人之上，思衣有羅絹千箱，思食有珍饈百味，上人趨，下人羨，人道我貴非貴也，亦乃時也、命也、運也，非吾之能也。

人生各有其時，富貴不能盡欺，天理循環，因而復始者也，人能知足，不怨天地，順天理，立善造命運。

嘆詩一首：

鶉衣百結不堪縫，一片飛西一片東；朝怕嶺頭雲蔽日，暮驚洞口鶴呼風，半斤米粟無能買，滿腹文章總是空；幾度欲投江海去，術人許我有三公。

貧窮如虎，驚走六親，心正無虧，亦得安康；人貧志短語言低，馬瘦毛長無力嘶，得意貓兒雄似虎，失群鸞鳳不如雞，龍游淺水遭蝦戲，虎落平陽被犬欺，命裡未逢君且待，寬宏大量成富貴。

認命、知命、然後聽天可也。

